

ԲԷՑ-ՊԸԾՁԲ-17/11 պայմանագրով կատարված գնման վերաբերյալ

ԲԷՑ-ի վարկային ծրագրերի իրականացման և վերահսկման վարչության պետի տեղակալը 14.03.2017թ. զեկուցագրով (Մուտք 15.03.2017թ. N784) դիմել է ընկերության գլխավոր տնօրենին՝ «Հայանտառ» ՊՈԱԿ-ի Սյունիքի և Կապանի անտառտնտեսություններում և «Զանգեզուր կենսոլորտային համալիր» ՊՈԱԿ-ի «Արևիկ» ազգային պարկի տարածքում էլեկտրահաղորդման գծի և ենթակայանի կառուցման ծրագրի շրջանակներում հենարանների մոտեցման ճանապարհների կառուցման համար ծառահատումների ծառայության մատուցման մրցույթ կազմակերպելու համար:

Գնման մրցույթը կազմակերպվել է պարզեցված ընթացակարգով: Մրցույթի կազմակերպման և անցկացման համար ԲԷՑ-ի գլխավոր տնօրենի 28.03.2017թ. 39-Լ հրամանով կազմավորվել է հանձնաժողով: Ըստ ԲԷՑ-ի ներկայացրած փաստաթղթերի՝ մրցույթին մասնակցելու հայտ է ներկայացրել մեկ մասնակից՝ «Էներգո ցանց Մոնտաժ» ՍՊԸ-ն, որն էլ մրցույթի ընտրված մասնակից է համարվել գնման ենթակա երկու չափաբաժնի աշխատանքների համար՝ 12,752,800.0 ՀՀ դրամ գնային առաջարկով: Մրցույթի կազմակերպման և ընթացակարգի գնահատման գործընթացն իրականացնելիս հանձնաժողովը 10.04.2017թ. երկրորդ ժողովի արձանագրությամբ հաստատել է, որ մասնակցի կողմից հայտով ներկայացված փաստաթղթերը համապատասխանում են հրավերով սահմանված վավերապայմաններին:

22.05.2017թ. ԲԷՑ-ը «Էներգո ցանց Մոնտաժ» ՍՊԸ-ի հետ կնքել է անտառահատման ծառայությունների մատուցման ԲԷՑ-ԲԸԾՁԲ 17/11 պայմանագիրը: Պայմանագրի գործունեության ժամկետ սահմանվել է 30 օր:

Գնման հայտում ընդգրկվել են հետևյալ աշխատանքները՝

1. Սյունիքի անտառտնտեսությունում իրականացնել 2.5 հա մակերեսի վրա անտառահատում, որի արդյունքում պետք է առաջանար 80.5 խմ բնափայտ,

2. Կապանի անտառտնտեսությունում իրականացնել 4.24 հա համակերեսի վրա անտառահատում, որի արդյունքում պետք է առաջանար 476.53 խմ բնափայտ,

3. «Զանգեզուր կենսոլորտային համալիր» ՊՈԱԿ-ի «ԱՐՆԻԿ» ազգային պարկի տարածքում իրականացնել 2.13 հա համակերեսի վրա անտառահատում, որի արդյունքում պետք է առաջանար 98.13 խմ բնափայտ:

Աշխատանքները կատարելիս «Էներգո ցանց Մոնտաժ» ՍՊԸ-ն պետք է իրականացներ առաջացած շինափայտի, տեխնոլոգիական փայտի, սաղարթի առանձնացում և հատման տեղից հեռացում, մոտեցում անտառմիջյան ճանապարհներին, վառելափայտի և շինփայտի տեղափոխում պահեստ: Ընդ որում ընկերությունը, եռօրյա պարբերությամբ, պետք է պատվիրատուին ներկայացներ տեղեկատվություն կատարված աշխատանքի վերաբերյալ՝ վերստուգելով դրա

իսկությունը, կտրված բնափայտի ծավալները (խ/մ) պետք է համընկնեն գույքագրման արձանագրությամբ որոշված ծավալներին:

Համաձայն 20.06.2017թ. «Պայմանագրի արդյունքը պատվիրատուին հանձնելու փաստը ֆիքսելու վերաբերյալ» ակտի «Էներգո ցանց Մոնտաժ» ՍՊԸ-ն իրականացրել է անտառահատում միայն 2.5 հա մակերեսի վրա, իսկ 16.06.2017թ. հանձնման-ընդունման արձանագրության՝ 2.5 հա տարածքում ծառահատման արդյունքում առաջացած 41 մետր խորանարդ վառելափայտը պահեստավորվել է ԲԷՑ-ի «Գորիս» մասնաճյուղում:

03.11.2017թ. ԲԷՑ-ը կատարված աշխատանքի դիմաց «Էներգո ցանց Մոնտաժ» ՍՊԸ-ին վճարել է 3,980,267.0 ՀՀ դրամ:

ԲԷՑ-ԲԸԾԶԲ 17/11 պայմանագրի՝ 20.06.2017թ. կնքված N01 համաձայնագրով աշխատանքների կատարման ժամկետը կասեցվել է մինչև անտառահատվող հատվածների ճանապարհների վերջնական նախագծման ավարտը:

Անհամապատասխանություններ

- Բացակայում են ընդհանուր նշանակության և հատուկ նշանակության անտառային հողերի օգտագործման համար ՀՀ օրենսդրությամբ նախատեսված փաստաթղթերը, անտառային տնտեսությանը հասցվող վնասի հատուցման վերաբերյալ ծրագիր (այսուհետ՝ ծրագիր), որը ներառում է օգտագործման տրամադրվող անտառային տարածքի առնվազն կրկնապատիկի չափով անտառապատման աշխատանքների իրականացման նախագիծը և անտառապատման ժամանակացույցը:
- ՀՀ կառավարության 2007 թվականի օգոստոսի 30-ի N 1045-Ն որոշմամբ նշված փաստաթղթերը ԲԷՑ-ի կողմից հաշվեքննության ընթացքում չեն երկայացվեցին:

Կատարված 2.5 հա անտառահատման դիմաց անտառօգտագործման հետևանքով անտառներին և անտառային հողերին պատճառված վնասի վերականգնման աշխատանքներ չեն իրականացվել

➤ 2017թ. կատարված 2.5 հա անտառահատման դիմաց անտառօգտագործման հետևանքով անտառներին և անտառային հողերին պատճառված վնասի վերականգնման աշխատանքներ 30.09.2018թ. դրությամբ չեն իրականացվել:

➤ ԲԷՑ-ի գլխավոր տնօրենի առանց ժամանակային թվագրման գրությամբ հաստատված գնման հրավերով սահմանված են

գնման առարկայի բնութագիրը և տեխնիկական առաջադրանքը, որոնց «այլ պայմաններ» մասում, որպես կատարման վայր, նշված են միայն Սյունիքի և Կապանի անտառտնտեսությունները, իսկ «Զանգեզուր կենսոլորտային համալիր» ՊՈԱԿ-ի «Արևիկ» ազգային պարկի մասին նշումը բացակայում է:

- Մրցույթի փաստաթղթերն ուսումնասիրելիս պարզվեց, որ հարկային մարմնի կողմից 12.04.2017թ. ներկայացված եզրակացությունում ժամկետանց հարկային պարտավորությունների սյունակում տեղեկությունը բացակայում է, որը չի կարող միանշանակ համարվել տվյալ պահին հարկային չկատարված պարտավորության բացակայություն, եզրակացությամբ բացակայում են նաև նախորդ հաշվետու տարվա ընթացքում պարտավորությունների և ակտիվների հաշվապահական հաշվեկշռային արժեքի մասին տեղեկությունները: Ընդ որում, հարկային մարմինների տվյալների ուսումնասիրությունից պարզ է դառնում, որ «Էներգո ցանց Մոնտաժ» ՍՊԸ-ն, որը հանդիսանում է շրջանառության հարկ վճարող, 21.04.2017թ. դրությամբ ունեցել է 1,945,341.0 ՀՀ դրամ չվճարված հարկային պարտավորություն:
- «Էներգո ցանց Մոնտաժ» ՍՊԸ-ի կողմից, որպես նախկինում նմանատիպ աշխատանքներ անհրաժեշտ ծավալով կատարված լինելու փաստը հաստատող փաստաթղթեր, ներկայացվել է անտառահատում իրականացնելու վերաբերյալ «Հուլիս ապավեն» ՍՊԸ-ի հետ 18.01.2017թ. կնքված Ա-1067/16 պայմանագիրը և այդ պայմանագրով կատարված աշխատանքների 22.03.2017թ. հանձնման-ընդունման ակտը: Պայմանագրով

Պայմանագրով սահմանված 5,880,000 ՀՀ դրամ արժեքը և պայմանագրով կատարված աշխատանքների հանձնման-ընդունման նշված արժեքը՝ 7.840.000 ՀՀ դրամ, իրար չեն համապատասխանում

սահմանված 5,880,000.0 ՀՀ դրամ արժեքը և պայմանագրով կատարված աշխատանքների հանձնման-ընդունման 22.03.2017թ. ակտում նշված աշխատանքների կատարման արժեքը՝ 7.840.000.0 ՀՀ դրամ, իրար չեն համապատասխանում: Ընդ որում, եթե նախորդ նմանատիպ աշխատանքների պայմանագրի գինը կազմում է 5,880,000.0 ՀՀ դրամ, ապա

այն պակաս է մասնակցի առաջարկած 12,752,800.0 ՀՀ դրամ գնային առաջարկի հիսուն տոկոսից:

- Անտառահատում իրականացնելու համար «Էներգո ցանց Մոնտաժ» ՍՊԸ-ի տեխնիկական միջոցների, աշխատանքային ռեսուրսների առկայությունը հաստատող փաստաթղթերը ԲԷՑ-ի կողմից չի ներկայացվել:

Պահեստ է հանձնվել մոտ 40խմ պակաս բնափայտ

➤ Պահեստ է հանձնվել մոտ 40խմ պակաս բնափայտ քան նախատեսված է գնման հայտում:

➤ 30.09.2018թ. դրությամբ ԲԷՑ-ԲԸԾՁԲ 17/11 պայմանագրի մնացած մասի կատարման աշխատանքները վերսկսված չեն: Հատված անտառի վերաճի արդյունքում արդեն կատարված աշխատանքն արդյունավետ չի լինի:

- 30.09.2018թ. դրությամբ ԲԷՑ-ի կողմից պայմանագրի կատարման համար խոչընդոտ հանդիսացած հանգամանքների կապակցությամբ պատճառված վնասների փոխհատուցման համար որևէ գործողություն չի ձեռնարկել:

Ստուգմամբ արձանագրված այլ փաստեր

- ԲԷՑ-ի կողմից չի կանխատեսվել և չի կանխվել այն խնդիրներն ու պատճառները, որոնց հետևանքով գնված աշխատանքների կատարումը անավարտ է մնացել: Մասնավորապես, «Սանիր» ընկերությունն անտառահատման տարածքներում մոտեցման ճանապարհներ չի կառուցել, տեղանքի ռելիեֆի բարդությանը համապատասխան չի նախատեսվել հենարանների մոտեցման ճանապարհների կիրառելի տարբերակները:

ԲԷՑ-ԲԸԾՁԲ 17/05 պայմանագրով կատարված գնման վերաբերյալ

02.05.2017թ. ԲԷՑ-ը կնքել է «Արմ-Դավ» ՍՊԸ-ի հետ ծառայությունների մատուցման ԲԷՑ-ԲԸԾՁԲ 17/05 պայմանագիրը: Պայմանագրի գործունեության ժամկետ սահմանված է երկու տարի:

Մաքսային բրոքերային ծառայություններ մատուցելու պայմանագիր կնքելու մրցույթի վերաբերյալ ԲԷՑ-ը 01.03.2017թ. հրապարակել է հայտարարություն, որում կատարվել է փոփոխություն 03.03.2017թ.: Փոփոխությունը վերաբերել է ՀՀ ֆինանսների նախարարության կողմից հաստատված նոր ձևաչափով հայտ ներկայացնելուն:

Մրցույթին մասնակցելու հայտի ներկայացման վերջնաժամկետ է սահմանվել 13.04.2017թ. ժամը 15:00-ն: Մրցույթին մասնակցելու հայտ են ներկայացրել երկու սուբյեկտ՝ «ԴԻ ԶԻ ՔՈՆՍԱԼՏԻՆԳ» ՍՊԸ-ն՝ 13.04.2017թ. 13:35-ին, և «Արմ-Դավ» ՍՊԸ-ն՝ 13.04.2017թ. 14:59-ին:

ԲԷՑ-ի տնօրենի 28.02.2017թ.-ի N27-Լ հրամանով կազմավորված գնահատող հանձնաժողովի՝ 03.03.2017թ. ժամը 15:00-ի նիստին մասնակցել է հանձնաժողովի 4 անդամ, իսկ 13.04.2017թ. ժամը 15:00-ի մրցույթի արդյունքները ամփոփող նիստին՝ 3 անդամ:

ԲԷՑ-ի տնօրենի 28.02.2017թ.-ի N27-Լ հրամանով կազմավորված գնահատող հանձնաժողովը 2017 թվականի ապրիլի 13-ին, ժամը 15:00-ին (հաղթող մասնակցի կողմից հայտի փաթեթը ներկայացնելուց մեկ րոպե հետո) կայացած: Հանձնաժողովը որոշել է գնման մրցույթի հաղթող ճանաչել «Արմ-Դավ» ՍՊԸ-ին և վերջինիս հետ կնքել է ծառայության մատուցման պայմանագիր:

ԲԷՑ-ի 2017թ. գնումների պլանով նախատեսված է «մաքսային բրոքերային ծառայության ստացում»: Գնումների մրցույթի արդյունքում հաղթող մասնակցի հետ պայմանագիր է կնքվել երկու տարի ժամկետով՝ մինչև 05.05.2019թ.:

Անհամապատասխանություններ

Գնման մրցույթի արձանագրության մեջ բացակայում է գնման անհրաժեշտության և գնման ձևի ընտրության հիմնավորումը

➤ Գնման մրցույթի արձանագրության մեջ բացակայում է «Գնումների մասին» ՀՀ օրենքի 9-րդ հոդվածի 1-ին մասի 2-րդ կետով տեղեկությունը՝ սահմանված գնման անհրաժեշտության և գնման ձևի ընտրության հիմնավորումը:

- Մրցույթի հայտը և կից փաստաթղթերը կազմված են «մաքսային բրոքերային ծառայություններ մատուցելու» գնում կազմակերպելու համար: Մինչդեռ նման անվանումով գործառույթ մաքսային ոլորտը կարգավորող գործող հիմնական իրավական ակտերում սահմանված չէ: Բովանդակային առումով նման ծառայություն կարող է մատուցել մաքսային ներկայացուցիչը՝ իր համապատասխան որակավորում ունեցող մասնագետներով:
- Մրցույթի հայտի փաթեթում պայմանագրի հավելվածի նախագծում սահմանված է «մաքսային բրոքերի ծառայության իրականացման տեխնիկական բնութագիր», որտեղ, որպես ծառայության նկարագիր, նշված են օդային, ցամաքային տրանսպորտով, փոստային ծառայության միջոցով ներմուծվող և արտահանվող բեռների, ինչպես նաև էլեկտրաէներգիայի ներկրման և արտահանման «մաքսային բրոքերի ծառայության նկարագրի» բաղկացուցիչ մանրամասները: Համաձայն «ծառայության նկարագրի»՝ այն իրենից ներկայացնում է «բեռի մաքսային զննում, ձևակերպում, բացթողում, ծածկագրի ձևակերպում» բաղկացուցիչների ամբողջություն: ԵՏՄ մաքսային օրենսգրքով, «Մաքսային կարգավորման մասին» ՀՀ օրենքով նշված գործառույթների իրականացման իրավասությունները վերապահված են մաքսային մարմիններին և կարող են իրականացվել միայն նրանց կողմից: Նշված գործառույթները որևէ կերպ չեն կարող, որպես այդպիսին, դիտվել մաքսային ներկայացուցչի կողմից մատուցվող ծառայություններ:
- Մաքսային ներկայացուցչի աշխատակիցները, ըստ մաքսային գործը կանոնակարգող իրավանորմերի, կարող են մատուցել ապրանքների մաքսային հայտարարագրերի (համապատասխան սյունակների) լրացման, էլեկտրոնային համակարգի միջոցով հայտարարագիրը մաքսային հսկողության ներկայացման գործողություններ կատարելու ծառայություններ,